

Aam ro Tuuf Yohanes Ykom 3 Yohanes

Yohanes ymah meen k'Gayus

¹ Aam refo mbam k'jō Yohanes, ro tabi oh. Tkom aam refo tiim k'nyō Gayus, ro jō ksoh toni.

² Tafoh ajō ro jō ksoh; jō tari he ja nyō nhau smot *Tuhan* kaket to. Tna jō skabuk Allah re nyō kiyam fee. Tna skabuk re bi Ait yoo arin ro moof yee k'nyō re nhau. ³ Taa raa ro Kristen baro mama tna mawe k'jō mawe, “Gayus tait yros tu smot *Kristus* ysy bokyas rAit ro ati reto. Ait beroh yamo iso ro ati reto, susu fee.” Bokyas rana reto mno jō simaut mase. ⁴ Raa ro mfi kukek wojō to, soh jō tari he ana mamō mam iso ro ati reto kaket fares to, mno re jō simaut mase.

Yohanes ybaut Gayus

⁵ Tafoh ajō ro jō ksoh; raa ro Kristen ro nyō wase fares mbam remo roto tiwya mama mkyas bokyas ro Yesus mam remo anyō to. Tna jō tari he nyō nno bo ro moof k'ana. Bo ro nyō nno reto to, moof toni mamyot raa ro smot *Tuhan* ja mno. ⁶ Ana wetō hah me oh tna mkyas *k'jemaat* mam befo mawe, “Tii amu nmo nkyas Yesus yasom to, tna Gayus yatmof amu. Tna ati ro amu snok mbam remo rait to, ait yoo bo yee k'amu afo re amu nmo kaket.” Sik nno bo reto renti. Bo ro nyō nno mkah nhaf ro ase reto to, mnan si k'Allah yhaf rAit. ⁷ Tiwya ana wetō masen mamō mkyas Yesus yasom. Tna raa ro Kristen matmof ana.

Tna ana mayoh bo k'raa ro wase Allah to fee. ⁸ Rau ro moof to, anu bitrah amah wanu k'ana ro ja mamō mkyas bosmot ranu ro ati. Bno fetō kbe anu teta ana tna btak bsom bo ro ana masom wetō su.

⁹ Tiwya jō tkom aam tiim *k'jemaat* ranu reto. Menohe bi Diotrefes yari bokyas ajō fee. Ait safto yawe ait yesait aran yase ybo *jemaat* mam remo ranu reto. ¹⁰ Soh jō tama tmat anu mam beto to, kbe jō betoo bo ro Diotrefes yno mkair wetō. Tawe *k'jemaat* tawe, "Ja ait ykyas-kas amu. Tna ait hawe ymat raa wamu ro ja mamō mkyas Yesus yasom mam remo aro rau-rau ye. Tna anu ro nwe nmat raa ro mama wetō to, Diotrefes yno wa anu tna yikyak ana wetō masen frok mamō. Yno bo mkair toni meto."

¹¹ Gayus, tafoh ajō ro jō ksoh; nno bo mkair mfi raa taro mno to ma. Nmat raa ro mno bo ro moof tna nno bo mfi ana mno. Awya ro ja yno bo ro moof to, ait tait ku ro Allah rAit. Tna awya ro ja yno bo ro mkair to, ait retait wase Allah fares.

¹² Raa beta mbaut bi Demetrius, tna amu nbaut ait ye. Ait yhau yno bo moof mnan si bokyas ati reto. Tna nyō nhar nawe ja amu nkyas bokyas ro ati sai, ja amu sioh fee.

¹³ Bo ro tawe tkyas k'nyō to mawat fares. Menohe jō hawe bo tkom mkah aam. ¹⁴ Tnaut tawe kbe jō tama fooh to k'nyō tna tkyas bo wefo.

¹⁵ Jō skabuk re nyō nhau nhaf tnok sai. Nafoh wonyō ro mhau mam befo sor to mmah meen k'nyō. Tna tawe nyō nmah meen ajō k'tafoh wojō ro mhau mam beto aro sait-sait ye.

**Watum ro Tuhan Bosi ro Tna
Mai Brat: Watum ro Tuhan Bosi ro Tna (New
Testament+)**

copyright © 2005 Wycliffe Bible Translators, Inc.

Language: Mai Brat

Contributor: Wycliffe Bible Translators, Inc.

All rights reserved.

2020-11-11

PDF generated using Haiola and XeLaTeX on 21 Feb 2024 from source
files dated 29 Jan 2022

71146407-c883-5cc1-b1e8-017c229bf3fa